

Timmisartuutileqatigiiffik Air Greenland Namminersorlutik Oqartussanit 100 %-imik pigisariaqarneranik, imaluunniit nunatta piginneqataassutaasa, 37,5 %-iusut, naalagaaffimmut imaluunniit SAS-imut tunineqarpata, taakku arlaat nunatsinnut imminut akilersinnaanerunersoq pillugu apeqquteqaat aallaavigalugu oqallinnissamik siunnersuut.

(Inatsisartunut Ilaasortaq Anthon Frederiksen, Partii Naleraq)

Nunatsinni pigisat nalillit aqunneqarneri, kiisalu suliffeqarfiit inuiaqatigiinnit pigineqartut aqunneqarnerminni, annertunerusumik inuiaqatigiit pisariaqartitaat aallaavigalugit ingerlanneqarnissaat, nunatsinnilu amerlanerussuteqartunut aningaasarsionertigut ikorfartuinerunissaannut aqutissiuinermi iluaqutaanerunissaat anguniarlugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Per Rosing-Petersen, Attaviitsoq)

Akissuteqaat

(Naalakkersuisut Siulittaasuat)

Aallaqqaasiullugu Naalakkersuisut Anthon Frederiksenip, Partii Naleqqameersup, Air Greenlandimik piginnittuunermut pissutsit pillugit apeqquteqaat aallaavigalugu oqallinnissamut siunnersuutaanut taamatullu suliffeqarfiit inuiaqatigiinnit pigineqartut pillugit attaviitsup Per Rosing Petersenip apeqquteqaat aallaavigalugu oqallinnissamut siunnersuutaanut qujapput. Tamatumuuna ingerlatseqatigiiffinni tamakkiisumik ilaannakuusumilluunniit pigisatsinni pissutsit pingaarutillit nassuiarnissaannut periarfissiisoqarpoq.

Anthon Frederiksenip, Partii Naleqqameersup, oqallisigeqquaa Kalaallit Nunaanni Namminersorlutik Oqartussat timmisartuutileqatigiiffimmik Air Greenlandimik 100 %-imik piginnittuusariaqarnerisut imaluunniit Namminersorlutik Oqartussat taarsiullugu ingerlatseqatigiiffimmi aktiaatitik 37,5 %-iusut aktiaatilinnut allanut tassaasunut SAS-imut aamma danskit naalagaaffiannut tunisariaqanginnerai.

Naalakkersuisut siunnersuuteqartup § 37 malillugu apeqqutigisaanut nr. 179/2016-imeersumut Air Greenland A/S-imik piginnittuunermut pissutsit allaaseraat oqaatigalugulu Naalakkersuisut Naalakkersuisut piginneqataassutaasa angissusiannut allannguutissanut inassuteqarsimasut. Akissutigineqartuni taakkunani takuneqarsinnaavoq Naalakkersuisut Air Greenlandimut tunngatillugu aktiaatilinnut allanut taakku aktiaataannik tigusiumaniallutik pilersaaruteqanngitsut, tassami Naalakkersuisut Namminersorlutik Oqartussat aktiaatilinnit allanit aktianik pisissappata inuiaqatigiit aningaasaqarnerannut tunngatillugu taamaaliorneq iluaqutaassangatinnimmassuk.

Oqaatigineqarsinnaavoq taamatuttaaq Naalakkersuisut Air Greenlandimut piginneqataassutitik tuniniarlugit pilersaaruteqanngimmata kisiannili Air Greenlandimik piginneqataanertik atorniarlugu ingerlatseqatigiiffiup pitsaasumik suliffeqarfimmik

ingerlatsisoqarnera tunngavigalugu inuiaqatigiinnut iluaqutaanerata nuannaarutaaneratalu qulakkeerneqarnissaannut.

Taamaaliornikkulli oqartoqanngilaq Air Greenlandimut piginnittuunerup ilusiligaanera allanngortinneqarsinnaanngitsoq. Maannakkulli pissutsit taamaakkallartillugit Naalackersuisut naatsorsuutigaat taamaaliortoqassappat tamanna pissasoq aktiaatilinnit allanit ingerlatseqatigiiffimmi piginneqataassutinik annertunerusunik tuniserusulluni piserusulluniluunniit kissaateqartoqarnera tunngavigalugu.

Kiffartuussinissamik isumaqatigiissutinut tunngatillugu Naalackersuisut isumaat malillugu pingaaruteqarpoq kiffartuussinissamik isumaqatigiissutit suunerat eqqaasitsissutigissallugu. Namminersorlutik Oqartussat Air Greenlandimut kiffartuussinissamik isumaqatigiissutaat kiffartuussinissamik isumaqatigiissutinut allanut atuuttutuulli tassaapput piumasaqaatit niuernermt tunngatillugu taakkuinnaallutik attanneqarsinnaanngitsut tunngavigalugit suliaqartarnissanut ingerlatseqatigiiffinnut akiliutaasartut.

Kiffartuussinissamik isumaqatigiissutinut akiliutit aamma innuttaasut naalackersuinikkut suliaqartunit ikiorserneqartussat kissaatigineqartut kiffartuunneqarnerisa qaffasissusissaannut tapiissutaapput. Taamaammat kiffartuussinissamik isumaqatigiissutinut akiliutaasartut ingerlatseqatigiiffiit ataasiakkaat ingerlanneqarnerannut aningaasaliissutigisartagaannullu tapiissutaanngillat kisiannili suliassanik suliaqarnissamut akiliutaasartussanut isumaqatigiissutaallutik.

Apeqquteqaat aallaavigalugu oqallinnissamut tunngavilersuutitut apeqqutigineqarpoq Naalackersuisut Air Greenlandimi aktianik piginneqataassutaasa nalingi qanoq annertutiginersut. Tassunga Naalackersuisut oqaatigisinnaavaat Ingerlatseqatigiiffiup taannaannaalluni nalingi ukiumi naatsorsuuteqarfiusumi kingullermi 630 mio. koruuninut naatsorsorneqarsimmata. Namminersorlutik Oqartussat 37,5 %-inik piginneqataassuteqarlutik pigisaat 236 mio. koruuninik amerlassuseqassapput.

Taamaakkaluartoq ilisimasariaqarpoq ingerlatseqatigiiffiup taannaannaalluni nalinganik naatsorsukkatigut oqaatigineqarsinnaanngimmat aktianik piginneqataassut tuniniaasoqalersillugu qanoq naleqartigissanersoq. Nalitunerusinnaavoq nalikinnerusinnaallunilu apeqqutaalluni assersuutigalugu ingerlatseqatigiiffiup siunissami aningaasarsissutigisinnaasaanut naatsorsuutigisaasut suunersut.

Atuisut akikitsumik angalasinnaanerat qanoq qulakkeerneqarsinnaanersoq apeqqummut tunngatillugu pingaaruteqarpoq inuiaqatigiinnut atortulersuutinut tunngasut ineriartortinneqarnerisa unikaallatsinneqannginnissaat taamatullu inuiaqatigiinnut atortulersuutit aningaasalersuiffiiguarnissaat. Sullissinerup qaffasissuujuaannarnissaanut aningaasaqarnermullu tunngatillugu annertusaasoqarnissaanut taamaaliorneq pitsaanerpaanik periarfissiisarpoq.

Attaviitsup Per Rosing-Petersenip suliffeqarfiit inuiaqatigiinnit pigineqartut pisortanit ingerlatsivigineqarnerat oqaloqatiginnissutigerusuppaa. Oqaaseqaatit siunnersuummut ilanngussuunneqarsimasut annertussusii imarisaallu taamatullu Inatsisartut suleriaasissaanni piffissat oqaluffiusinnaasut pillugit aalajangersakkat eqqarsaatigalugit Naalackersuisut siunnersuummut ikittuinnarnik oqaaseqaatissaqarput.

Siunnersuummut tunngavilersuutini taamaassangatitsinerit taamaanneraanerillu saqqummiunneqarpoq Naalakkersuisut ataasiakkaanik oqaaseqarfigerusutaat.

Per Rosing-Petersen ilaatigut allappoq inuiaqatigiit tallimararterutaat tikillugit allanut qimaasimasut naalliunnertik qatsukkamikku. Naalakkersuisut misissuisimanernik taamatut taamaanneraanernut uppersaataasinnaasunik taamaattoqannginneraasunilluunniit ilisimasaqanngillat.

Allassimavortaaq uagut inuiaqatigiittut pigisatsinnik nalilinnik pisortatigoortumik taamatut ingerlatsinerput pissutaasoq inuiaqatigiinni pissarissaarnerpaat suliffeqarfiit kisermaallugit nuannaarutigigaat taamatullu inuiaqatigiinni pissakinnerpaat ingerlatsinerput kisimik akilersuisuusut nammineerlutik tamakkuninnga nuannaarutissineqaratik. Naalakkersuisut taamatut isumaqanngillat taamaanneraanerlu tunngavilersugaanngitsutut isumaqarfigalugu.

Naalakkersuisut isumaqarput suliffeqarfiit inuiaqatigiinnit pigineqartut ataatsimut isigalugu pissusissaatut pitsaasumik ingerlanneqartut suliffeqarfiillu amerlanerpaartaat eqqarsaatigissagaanni nuna tamakkerlugu innuttaasunut pitsaasumik sullissinissamik taakku siunertaqartut. Nunap ilaasa assigiinngitsut akornanni assigiimmik akeqartitsinerup aningaasaqarnikkullu naligiissarinerup qulakkeerneqarnissaannut ilaatigut ingerlatseqatigiiffiit Namminersorlutik Oqartussanit pigineqartut atorpavut, taamaalilluni innuttaasut tamarmik ingerlatseqatigiiffinnit naammaginantumik sullinneqarsinnaaniassammata. Assersuutitut taaneqarsinnaapput umiarsuartigut nassiussat aamma nalunaarasuartaatitigut attaveqatigiinnerit. Tamakkununnga ilanngullugu innuttaasut sullinneqarnerat sullissinissamik isumaqatigiissutitigut aningaasanik tapiissuteqartarluta annertuumik tapersersugaraarput. Tamakkununnga assersuutitut taaneqarsinnaapput nunaqarfiit isorliunerusullu nioqutissanik pilersorneqarnerat, ilaasunik angallassineq aamma tunisinissamut periarfissaqartitaanerat.

Taamaammat tamatigut eqqumaffigineqartariaqarpoq ingerlatseqatigiiffiit suliassatik qanoq suliarisarneraat sissueqqissaarlugulu tamakku pitsaanagerusumik suliarineqartarsinnaanersut. Naalakkersuisuniit isigalugu tunngaviusumik isumaqarpugut ingerlatseqatigiiffiutigut pisussaaffimminnik naammassinnittartut pikkorissumillu ingerlanneqarlutik.

Naalakkersuisuniit taamatut oqaaseqarluta Inatsisartut oqallinnissaat qilanaaraarput.